

# Forskrift om vass- og avløpsgebyr, Eidfjord kommune, Vestland

Heimel: Vedteke av Eidfjord kommunestyre dd. mmmmm 2026 med heimel i lov 6. juni 2025 nr. 26 om kommunale vass- og avløpsanlegg § 4 og forskrift 1. juli 2004 nr. 931 om begrensning av forurensning § 16-1 andre ledd.

## Kapittel 1. Generelle føresegner

### § 1-1. Føremålet med forskrifta

Forskrifta fastset utrekningsmåte og gebyrplikt for kommunen sine vass- og avløpstenester. Forskrifta skal bidra til stabile føresetnader for gebyrutrekninga.

### § 1-2. Verkeområde

Forskrifta gjeld for alle som er definert som abonnentar jf. § 1-4 bokstav b, og gjer bestemmingar om utrekning og innbetaling av gebyr som abonnentane skal betale for kommunen sine vass- og/eller avløpstenester.

### § 1-3 Gebyrsonar

Kommunen er delt inn i følgjande to gebyrsonar for vass- og avløpstenester:

- a. Sone Sysendalen: Omfattar alle eigedommar som er knytte til det kommunale vass- og/eller avløpsnett i Sysendalen. Gebyra i denne sona skal dekkje dei nødvendige kostnadane (sjølvkost) knytte til vass- og avløpsinfrastrukturen i dette geografiske området.
- b. Sone Eidfjord: Omfattar alle andre abonnentar i kommunen som er knytte til kommunale anlegg utanfor sone Sysendalen. Gebyra i denne sona skal dekkje dei nødvendige kostnadane knytte til tenesteproduksjonen i denne sona.

### § 1-4 Definisjonar

I denne forskrifta tyder:

- a. Eigedom: Fast eigedom registrert med eige gards- og bruksnummer, eige festenummer eller eige seksjonsnummer i matrikkelen. Seksjon etablert i samsvar med lovgivinga om eigarseksjonar vert rekna som sjølvstendig eigedom.
- b. Abonnent: Eigar eller festar av eigedom som er tilknytt kommunen sitt vass- og/eller avløpsanlegg, eller som er godkjend eller kravd tilknytt. Festar av eigedom skal stå som abonnent når gjenstående festetid då gebyrplikta oppstod var 30 år eller meir, eller festar har rett til å få festeavtalen forlenga slik at samla festetid vil kunne bli 30 år eller meir frå gebyrplikta oppstod. I burettslag er burettslaget abonnent. I eigarseksjonssameige er kvar eigarseksjon ein abonnent.
- c. Abonnement: Avtale mellom abonnent og kommunen om vass- og avløpstenester gjennom tilknytning av sanitærinstallasjonar og private vass- og avløpsanlegg til kommunen sine vass- og avløpsanlegg. Det er ikkje ein føresetnad at avtalen er skriftleg. Avtale om tilknytning via privat fellesledning vert rekna som abonnement.
- d. Sanitærinstallasjonar: Abonnenteigde røyr, installasjonar og utstyr innanfor ytterveggen til huset, som er tilknytt vass- og/eller avløpsanlegg.
- e. Privat vass- og avløpsanlegg: Abonnenteigde private leidningar (stikkleidningar) og utstyr utanfor ytterveggen til huset, som er tilknytt offentleg vass- og/eller avløpsanlegg.
- f. Avløpsvatn: Både sanitært og industrielt spillvatn og overvatn.
- g. Bygg/bygning: Konstruksjon/byggverk med eige bygningsnummer i matrikkelen.
- h. Brukseining: Bygning eller del av bygning (lokale), til dømes bustad, kontor, verkstad og lager.
- i. Bueining: Brukseining som er definert som bustad eller bueining i matrikkelen. Kvar brukseining som har minst eitt rom og eigen inngang, og der ein har tilgang til vatn og toalett utan å gå gjennom ei anna brukseining, vert rekna som ei bueining. Det er ikkje eit krav at bueiningane er godkjende som separate bueiningar og/eller fysisk skilt frå andre bueiningar. Brukseining som er definert som bustad i matrikkelen blir alltid rekna som bueining.
  1. Utleigerom i ein privat bustad: Hybel eller utleigerom vert ikkje rekna som ein sjølvstendig bustad, sidan ein må gå gjennom bustaden til andre for å kome til eige rom.
  2. Hyblar i hybelbygg: Kvar hybel vert rekna som sjølvstendig bustad, sjølv om bebuarane deler viktige funksjonar som kjøkken og/eller bad. Kjøkken, bad og gang som fleire deler, vert rekna som fellesareal og ikkje som ein integrert del av andre sine bustader.
- j. Bustadeigedom: Eigedom med bygg som vert brukt til bustadføremål, medrekna fritidsbustad. Bygningstype 111–199 etter NS-3457.
  1. Fritidseigedom: Eigedom der alle bustadbygg er registrert som fritidsbustad i matrikkelen.
  2. Fritidsbustad: Registrert i matrikkelen med bygningstype 161–163 etter NS-3457.
- k. Kombinasjonseigedom: Eigedom med ei eller fleire bueiningar, i tillegg til ei eller fleire brukseiningar som ikkje er bustad. Eigedom med ei eller fleire bueiningar i tillegg til ei eller fleire bygningar for fiskeri eller landbruk vert

klassifisert som kombinasjonseigedom. Dersom eigedomen er seksjonert etter eigarseksjonslova, vert kvar bustad- eller næringsseksjon rekna som ein eigen bustad- eller næringsseigedom.

- l. Næringsseigedom: Eigedom som ikkje er bustad, fritidsbustad eller kombinasjonsbygg. Bygg for offentlege føremål vert klassifisert som næringsbygg.
- m. Bruksareal (BRA): Bruksareal for eigedom som er registrert i matrikkelen og rekna med utgangspunkt i NS-3940.
- n. Gebyrsone: Eit geografisk avgrensa område eller ei gruppe eigedommar knytt til spesifikke anlegg, der gebyra for vass- og/eller avløpsstenester blir berekna særskilt basert på sjølvkostprinsippet for den aktuelle sona. Kommunestyret fastset inndelinga i gebyrsonar.

## § 1-5. Generell gebyrplikt

Plikta til å betale vass- og/eller avløpsgebyr gjeld abonnentar med:

- a. Fast eigedom som er eller frivillig blir tilknytt kommunal vass- og/eller avløpsleidning, direkte eller gjennom privat samleleidning.
- b. Eigedom som kommunen i medhald av plan- og bygningsloven §§ 27-1, 27-2 eller § 30-6 har kravd tilknytt kommunal vass- og/eller avløpsleidning.

Den generelle gebyrplikta gjeld også eigar av eigarseksjonar eller festa eigedom, som definert i § 1-4.

Første ledd bokstav b gjeld ikkje driftsbygningar i landbruket jamfør plan- og bygningsloven § 30-1.

## § 1-6. Gebyrtypar

Gebyrtypane er:

- a. Eingongsgebyr for tilknytning til høvesvis vatn og avløp.
- b. Årsgebyr for høvesvis vatn og avløp (summen av fast og variabel del).

I tillegg kan kommunen krevje betaling etter standardiserte satsar for kommunen sine kostnader ved avlesing av vassmålar, samt avstenging og påsetting av vassforsyning.

## § 1-7. Gebyrsatsar

Kommunestyret vedtek gebyrsatsane og avgjer når dei skal tre i kraft.

Gebyra skal fullt ut dekkje kommunen sine kostnader ved levering av tenestene regulert av denne forskrifta.

Gebyrsatsane kjem fram av gebyrregulativet, og er tilgjengelege på kommunen sine heimesider.

## § 1-8. Arealutrekningsmetode

Dersom utrekninga av gebyr vert gjort avhengig av bustaden sin storleik, skal det vere bruksarealet rekna etter NS-3940 som dannar grunnlaget for gebyrfastsetjinga.

Garasjar, uthus, anneks, utvendige buer og naust vert ikkje medrekna som bruksareal for bustad- og kombinasjonseigedom. Bygningstype 181–183 etter NS-3457.

I ein overgangsperiode fram til 1. januar 2028 vert bygningstype 233, 241, 243, 244, 245, 248 og 249 etter NS-3457 haldne utanfor utrekningsgrunnlaget for nærings- og kombinasjonseigedom.

Dersom eigedomen sine opplysningar i matrikkelen er mangelfulle, kan kommunen estimere arealet basert på gjennomsnittsoverslag basert på bygningstype. Abonnementen kan sjølv skaffe dokumentasjon på eigedomen sitt gebyrpliktige areal.

Som grunnlag for utrekning av gebyr tar kommunen utgangspunkt i opplysningane i matrikkelen. Opplysningar skal korrigerast dersom dei er feilaktige.

# Kapittel 2. Tilknytingsgebyr

## § 2-1. Gebyrplikt

Gebyr for tilknytning til kommunalt vass- og/eller avløpsanlegg skal betalast for:

- a. Tilknytning av eigedom.
- b. Tilknytning av eigedom som kommunen krev tilknytt, jf. pbl. §§ 27-1 og 27-2 og pbl. § 30-6.
- c. Eigedom med tilknytning som ikkje er godkjent
- d. Tiltak som utvidar det gebyrpliktige bruksarealet etter § 1-8 og arealutvidinga medfører auke i talet på brukseiningar.

Tilknytingsgebyr for tilknytning til vatn og/eller avløp skal ikkje betalast for:

- a. Seksjonering av allereie tilknytt eigedom utan at bruksarealet for eigedomen endrast.
- b. Bygg som har mellombels tilknytning i opptil tre år, til dømes brakkerigg. Dersom tilknytninga varer i meir enn tre år, skal det verte kravd tilknytingsgebyr.
- c. Særskild tilknytning av sprinklaranlegg.

## § 2-2. Utforming av gebyra

Tilknytingsgebyret er eit eingongsgebyr og vert betalt etter fastsette kategoriar i gebyrregulativet.

Om kommunen overtek private vatn- og/eller avløpsanlegg kan kommunen fastsetja særskild sats i det enkelte tilfellet.

Bustadeigedom skal betale eingongsgebyr for tilknytning som eit fast beløp per bueining.

Fritidseigedom skal betale eingongsgebyr for tilknytning etter eit fast beløp per brukseining.

Næringseigedom skal betale eingongsgebyr for tilknytning som eit fast beløp per brukseining som er tilknytt.

Kombinasjonseigedom skal betale eingongsgebyr for tilknytning for kvar del etter reglane ovanfor.

Ved utviding av gebyrpliktig areal etter § 2-1 første ledd bokstav d, vert det berre rekna tilknytingsgebyr for sjølve utvidinga.

## § 2-3. Ansvar og betaling

Tilknytingsgebyr skal vere betalt før tilknytning.

Den som er abonnent på det tidspunktet gebyrplikta oppstår, er ansvarleg for betaling av gebyret. Dette gjeld også der faktura for tilknytingsgebyr opphavleg er sendt til ein utbygger, tiltakshavar eller andre, dersom gebyret står ubetalt på tidspunktet for den fysiske tilknytninga til kommunens vass- og/eller avløpsleidning. Kommunen vil varsle abonnenten om ubetalt tilknytingsgebyr på eigedommen så snart abonnenten er kjent for kommunen. Abonnenten er ansvarleg for å betale fakturaen dersom utbygger eller annan tiltakshavar ikkje gjer opp med kommunen innan ein nærmare fastsett frist.

Kommunen fakturerer gebyret samstundes som igangsettingsløyvet blir gitt, med den satsen som gjeld på faktureringstidspunktet. For eksisterande bygg med tilknytning som ikkje er godkjend, vert tilknytingsgebyr betalt etter gjeldande sats på det tidspunktet kravet vert framsett eller foreldingsfristen sitt utgangspunkt, jamfør foreldingslova § 3.

## Kapittel 3. Årsgebyr

### § 3-1. Gebyrplikt

Årsgebyr skal betalast for alle eigedomar som:

- a. Er knytte til kommunalt vass- eller avløpsanlegg.
- b. Er pålagde tilknytning til kommunalt leidningsnett etter plan- og bygningslova eller anna lov, frå det tidspunktet fristen for tilknytning i pålegget er ute, jf. vass- og avløpsanleggslova § 4 andre ledd.

Årsgebyr vert rekna frå den tidlegaste av dato for mellombels bruksløyve eller dato då eigedomen vart teken i bruk i tilfelle der mellombels bruksløyve ikkje er gitt. For mellombels tilknytningar blir årsgebyr rekna frå dato for tilknytning til dato når tilknyttingen blir avslutta.

Gebyrplikta er uavhengig av om det er utandørs tappepunkt/vasspost eller om det er innlagt vatn.

### § 3-2. Gebyret sin oppbygning

Årsgebyra for vass- og avløpstenester er samansette av to delar:

- a. Abonnementsgebyr (fast del).
- b. Forbruksgebyr (variabel del).

Inntektene frå abonnementsgebyret skal fortrinnsvis dekkje dei forventa faste kostnadane til vass- og avløpstenestene. Kor stor del av årsgebyret som skal vere fast og variabel del, vert kvart år fastsett i gebyrregulativet.

### § 3-3. Abonnementsgebyr

Bustadeigedom skal betale abonnementsgebyr som ein fast sats per bueining.

Fritidseigedom skal betale abonnementsgebyr etter ein eigen sats per brukseining. Satsen kan vera ulik satsen for bustadeigedom.

Alle bustad- og fritidseigedommar skal betale minst eitt abonnementsgebyr.

Nærings- og kombinasjonseigedom skal betale abonnementsgebyr etter fastsette kategoriar som speglar vassforsyningskapasiteten til den einskilde eigedom. Kategoriane kjem fram av gebyrregulativet.

I bygning der kommunen har gitt løyve til at fleire eigedomar kan dele vassmålar skal abonnentane betale abonnementsgebyr som ein fast sats per brukseining.

### § 3-4. Forbruksgebyr

Abonentane skal betale forbruksgebyr etter målt eller stipulert vassforbruk i m<sup>3</sup>. Både kommunen og abonnenten kan krevje at forbruksgebyret vert fastsett ut frå målt forbruk. Dersom forbruksgebyret allereie er fastsett ut frå målt forbruk kan dette ikkje reverserast slik at forbruket blir rekna ut etter stipulert vassforbruk.

Det vert ikkje gjeve nedsett forbruksgebyr for storforbrukarar av vatn.

Vassforbruk til sprinklaranlegg er ikkje gebyrpliktig.

Som hovudregel gjeld at avløpsmengda vert rekna lik vassmengda ved utrekning av forbruksgebyr. Unntak frå dette er nemnt i § 3-7 femte ledd.

### **§ 3-5. Betaling etter målt forbruk**

Forbruksgebyr skal betalast for rapportert årsforbruk. Følgande eigedomar skal betale etter målt forbruk og ha vassmålar installert:

- a. Næringseigedom, medrekna bygg for offentlege føremål.
- b. Kombinasjonseigedom, medrekna eigedomar med ei eller fleire bueiningar i tillegg til ei eller fleire bygningar for fiskeri eller landbruk.
- c. Anlegg med varig eller mellombels tilknytning i samband med oppføring av bygg eller anlegg.

Dersom det ikkje er mogleg å installere vassmålar kan kommunen fastsetje eit stipulert forbruk.

For mellombelse tilknytningar kan kravet om vassmålar fråvikast dersom vassmengda kan verte fastsett på andre måtar.

### **§ 3-6. Betaling etter stipulert forbruk**

Eigedom som ikkje har vassmålar, skal betale forbruksgebyr etter stipulert forbruk.

Stipulert forbruk vert rekna ut frå eigedomen sitt bruksareal, jf. § 1-8, multiplisert med ein faktor for vassforbruk per kvadratmeter bruksareal. Faktoren kjem fram av gebyrregulativet.

Kommunen kan fastsetja særskilt omrekningsfaktor for fritidsbustader.

Kommunen kan fastsetja stipulert forbruk for eigedom som berre har utandørs tappepunkt/vasspost. Forbruket kjem fram av gebyrregulativet.

### **§ 3-7. Reduksjon av eller tillegg til årsgebyr**

Restriksjonar på vassforbruket, avbrot i vassleveransen eller i mottak av avløpsvatn gjev ikkje grunnlag for reduksjon av gebyra.

Fråflytting eller fråvære gjev ikkje grunnlag for reduksjon av gebyra. Er bustad/bygg på eigedomen fjerna, eller øydelagd slik at den ikkje kan verte brukt, betalast årsgebyr inntil stikkleidning er fråkople (plugga) ved hovudleidninga.

Ved søknad til kommunen kan abonnenten få fritak for årsgebyret når eigedomen fysisk vert fråkople kommunalt leidningsnett. Abonnementet tek slutt når melding om plombering er motteke.

Ny tilknytning av eigedomen utløyser ikkje ny betaling av eingongsgebyr for tilknytning. Både arbeidet med å kople frå og ny tilknytning vert utført for abonnenten sin kostnad og etter kommunen si tilvising. Om kommunen utfører stenging eller påsetjing av vassforsyninga vil kommunen krevja betaling etter standardisert sats til dekning av dei forventa kostnadane for kommunen. Sats kjem fram av gebyrregulativet.

For eigedom som ikkje vert brukt som bustad, og der avløpsmengda er vesentleg større eller mindre enn vassforbruket, kan avløpsgebyret verte rekna ut frå målt avløpsmengd, eller verte fastsett etter særskild avtale med kommunen.

For eigedom der avløpsvatnet si samansetjing avvik frå vanleg hushaldsavløp og verkar fordyrande på drift og vedlikehald av kommunen sitt avløpsanlegg, kan kommunen fastsetje eit tillegg til avløpsgebyret til dekning av meirkostnadane. I slike tilfelle vert det inngått ein separat avtale mellom kommunen og abonnenten.

Dersom avløpsmengda frå eigedomen er vesentleg mindre enn vassforbruket eit år, som følgje av lekkasje på det private vassanlegget (stikkleidning for vatn), kan abonnenten søke om at kommunen fastset avløpsgebyret ut frå avløpsmengda frå året før. Søknaden må innehalde dokumentasjon frå godkjend røyrleggar som viser at lekkasjevattnet ikkje er tilført privat avløpsanlegg (stikkleidning for spillvatn). Abonnenten er sjølv ansvarleg for å skaffe denne dokumentasjonen.

### **§ 3-8. Gebyrreduksjon i medhald av forbrukarkjøpslova sine reglar om prisavslag**

Abonnenten har rett til reduksjon i gebyr (prisavslag) ved feil eller mangel ved vassforsyninga i medhald av forbrukarkjøpslova sine reglar om prisavslag. Abonnenten har rett til redusert forbruksgebyr dersom ikkje-varsla avbrot i vassforsyninga varer i meir enn 24 timar.

Vilkår for gebyrreduksjon er at mangelen kjem av forhold på kommunen si side, til dømes forureining i vasskjelde eller feil ved kommunalt anlegg. Kommunen pliktar å bidra til å avklare ansvarsforholdet.

Generell tilråding om koking som tryggleikstiltak etter trykkfall på grunn av reparasjon, spyling, brannslukking med meir, gjev ikkje grunnlag for gebyrreduksjon.

Krav om redusert gebyr må verte fremja innan to månader etter at forholdet oppstod, dersom ikkje kommunen har fatta eige vedtak om gebyrreduksjon.

Sats for gebyrreduksjon vert fastsett i gebyrregulativet.

### **§ 3-9. Pålegg om utbetring**

Kommunen kan krevje dekt alle kostnader direkte knytt til tiltak som følgje av at abonnent har unnlate å etterkome pålegg om å utbetre lekkasjar på eigedomen si vassleidning eller manglar ved avløpsanlegg eller sanitærutstyr. Ved omlegging eller utbetring av avløpsleidningar kan kommunen krevje at eigar av tilknytt stikkleidning set i verk tilsvarande omlegging eller utbetring.

Gebyrpliktig som unnlèt å etterkome pålegg om utbetring av lekkasjar som medfører forureining kan verte kravd tvangsmulkt etter Vass- og avløpsanleggslova § 16.

### **§ 3-10. Ansvar for opplysingar om abonnement**

Abbonenten skal melde frå til kommunen om endringar i abonnementsforholdet.

### **§ 3-11. Ansvar for gebyra**

Abbonenten har ansvar for betaling av årsgebyret, uansett om gebyrkravet er retta mot abonnenten eller annan rekningsmottakar.

Abbonentar som samarbeider om felles vass- eller avløpsmålar, er solidarisk ansvarlege for gebyra. Gjeld slikt samarbeid eit sameige etter eigarseksjonslova, er kvar abonnent ansvarleg for ein del av gebyret i samsvar med sin eigarpart, dersom ikkje anna fordeling er fastsett i sameiget sine vedtekter eller bindande vedtak i sameiget.

### **§ 3-12. Retting av feil gebyrutrekning**

Har mangelfulle eller feil opplysingar ført til feilaktig utrekning av gebyr, skal utrekninga rettast og differansen verte gjort opp. Krav som er forelda etter reglane om forelding av fordringar, vert normalt ikkje dekt.

## **Kapittel 4. Innbetaling av årsgebyr**

### **§ 4-1. Innbetaling**

Forfalne krav på årsgebyr er sikra med pant i eigedomen etter panteloven § 6-1.

Abonnementsgebyr og forbruksgebyr vert innkravd på felles faktura.

Når ein abonnent får installert vassmålar gjeld reglane for stipulert forbruk fram til dato for installasjon av målareren føresett at denne er godkjend av kommunen etter reglane i § 5-2.

Faktura vert sendt til abonnent.

Eigedomar med felles vassmålar og som har avtalt med kommunen at dei skal fakturerast felles, vert fakturert via ein eigar/festar av eigedomen eller særskild avtalt rekningsmottakar.

Årsgebyra vert kravd inn over eit tal terminar som vert fastsett i gebyrregulativet.

### **§ 4-2. Manglande innbetaling**

Dersom årsgebyret ikkje er betalt innan ein månad etter at den gebyrpliktige har motteke andre gongs varsling om innbetaling, kan kommunen stengje den kommunale vassforsyninga til eigedomen så framt kommunelegen ikkje motset seg avstenginga.

Kommunen kan krevje betaling frå abonnent for å dekkja kostnadane i samband med stenging og påsetjing av vassforsyninga. Satsen for betaling kjem fram av gebyrregulativet.

## **Kapittel 5. Føresegner for installasjon og bruk av vassmålar**

### **§ 5-1 Målarartypar**

Føresegnene for vassmålarar gjeld tilsvarande for eventuelle avløpsmålarar. Føresegnene gjeld for vass-/avløpsmålarar med fjernavlesing så langt dei passar.

### **§ 5-2. Installasjon**

Kommunen avgjer kor mange vassmålarar den einskilde eigedom skal ha, og dessutan type, storleik og plassering på vassmålareren.

Kommunen skal godkjenne den som skal stå for installasjon og vedlikehald, og dessutan eventuell flytting, utskifting eller fjerning av målareren.

Dersom eksisterande eigedom med vassmålar vert oppdelt i nye eigedomar, skal kvar av de nye eigedomane ha eigen vassmålar.

Abbonentar kan samarbeide om felles vassmålar der det vil vere særleg kostbart å installere eigen målar for kvar eining. Årsgebyr vert fordelt på abonnentane etter reglane i § 3-11 andre ledd.

Pålagt vassmålar for ny eigedom skal vere installert seinast når det vert gjeve mellombels bruksløyve eller eigedomen vert teke i bruk, og for eksisterande eigedom når den vert tilknytt. Dersom dette vert unnlate, skal abonnenten betale stipulert årsgebyr etter § 3-6.

For installasjon og bruk av vassmålarmålar gjeld elles forskrift om krav til vassmålarmålar og kommunens tekniske bestemningar.

### **§ 5-3. Eigarforhold og kostnader**

Ved installasjon av ny vassmålarmålar skal kommunen stå som eigar av denne. Installasjonskostnader vert dekt av abonnenten.

For anskaffing og vedlikehald av vassmålarmålar vert det betalt ei årleg leige. Pris for leige av vassmålarmålar kjem fram av gebyrregulativet.

Dersom ein vassmålarmålar vert borte eller skadd, skal abonnenten omgåande melde dette til kommunen. Kommunen tek atterhald om retten til å krevje full erstatning for tap eller skade.

### **§ 5-4. Avlesing av vassmålarmålar**

Abbonnten skal lese av vassmålarmålar så nær fastsett tidspunkt for avrekning som mogleg og sende resultatet til kommunen innan fastsett frist. Tidspunkt for avlesing vert fastsett i gebyrregulativet.

Unnlèt abonnenten å lese av vassmålarmålar kan kommunen etter purring fastsetje årsgebyret etter skjøn.

Dersom abonnenten unnlèt å foreta avlesing kan kommunen sjølv setje i verk avlesing utan ytterlegare varsel til abonnenten og krevje særskild betaling for å dekkje kommunens kostnader med dette. Satsen for betaling kjem fram av gebyrregulativet.

§ 5-4 første og andre ledd gjeld ikkje abonnentar med fjernavlesing av vassmålarmålar.

### **§ 5-5. Tilsyn og vedlikehald**

Abbonnten skal halde vassmålarmålar lett tilgjengeleg for avlesing, tilsyn og vedlikehald.

Abbonnten skal føre tilsyn med vassmålarmålar. Abonnenten er også ansvarleg for å følgje med på forbruksutviklinga, slik at lekkasjar eller feil vert oppdaga snarast mogleg. Vert ein vassmålarmålar skadd eller går tapt, skal abonnenten straks melde frå til kommunen. Broten plombering av vassmålarmålar vert også rekna som skade.

Kommunen kan krevje erstatning for skadar abonnenten påfører kommunens anlegg, medrekna vassmålarmålar, etter dei vanlege reglane om skadeserstatning.

Kommunen skal føre tilsyn med vassmålarmålar i samsvar med sitt eige internkontrollsystem. Kontrollør frå kommunen skal legitimere seg utan oppmoding.

### **§ 5-6. Avrekning ved feilmåling**

Dersom vassmålarmålar ved kontroll viser større målarfeil enn grenseverdiane som er tillate etter forskrift om krav til vassmålarmålar, har abonnenten krav på tilbakebetaling av for mykje betalt årsgebyr som følgje av feilmålinga. Er plomberinga broten, har abonnenten ikkje krav på tilbakebetaling.

Tilbakebetalinga vert rekna frå det tidspunkt ein legg til grunn at feilen må ha oppstått.

Krav som er forelda etter foreldingslova, vert ikkje dekt.

Kommunen har krav på tilleggsbetaling etter tilsvarande reglar om målarfeilen har gjort at abonnenten har betalt for låge gebyr.

### **§ 5-7. Nøyaktigheitskontroll**

Kommunen skal ha sitt eige internkontrollsystem for å sikre korrekte målarverdiar og skal gjere kontroll av vassmålarmålarane etter dette. Abonnentane kan krevje kontroll av sin målar ved mistanke om feil.

Dersom kontrollresultatet ligg utanfor feilmarginen etter forskrift om krav til vassmålarmålar, vert det utført ei justering, eventuelt utskifting av vassmålarmålar, utan utgifter for abonnenten. Dersom abonnenten har kravd nøyaktigheitskontroll og det ikkje vert påvist feil utanfor feilmargin, vert kostnadane betalt av abonnenten.

### **§ 5-8. Utskifting og flytting**

Er målenøyaktigheita for dårleg, bestemmer kommunen om vassmålarmålar skal verte justert eller utskifta. Når vanleg levetid for ein vassmålarmålar er nådd, kan kommunen bestemme at vassmålarmålar heilt eller delvis skal skiftast ut.

Kommunen kan krevje flytting av vassmålarmålar som er plassert i strid med kommunen sine krav til plassering. Abonnenten betaler for slik flytting.

## **Kapittel 6. Avsluttande bestemmingar**

### **§ 6-1. Klage og omgjering**

Det er ikkje høve til å klage på gebyr som er fastsett i samsvar med denne forskrifta, etter reglane i forvaltningslova. Einskilde vedtak gjort i medhald av denne forskrifta, kan klagast til særskild klagenemnd, jamfør forvaltningslova § 28 andre ledd.

Gebyr må betalast innan forfallsdato sjølv om gebyrvedtaket er klaga inn.

### **§ 6-2. Ikraftsetjing**

Forskrifta trer i kraft 1. januar 2027.

Frå same tid vert tidlegare forskrift om vass- og avløpsgebyr i Eidfjord kommune oppheva.